



4. marts 2016

UPA 2016/56

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Illoqarfimmi aallaasersortoqarsimatillugu pinerluttulerinermut inatsit naapertorlugu pineqaatissiisinnaangornissaq anguniarlugu tassungalu ilanngullugu imigassamik atornerluisoqarsimaneq pissutigalugu nakkutigineqartussangortitsilluni pineqaatissiinerit aamma aallaasit atorneqarsimasut arsaarinnissutigineqartalernissaata Kalaallit Nunaanni Pinerluttulerinermut Inatsimmut ilanngunneqarnissaat pillugit Naalakkersuisut isumaqatigiinniaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraterne)

Tunngavilersuut

Akuttunngilaq illoqarfimmi nunaqarfimnilu aallaasersortut politiinit tigusarineqartarnerat aqaguanilu akiligassinneqariarlutik iperaqqinneqartarnerat. Taamatut pisoqartarpoq politiit uppersarsarsinnaangikkaangassuk Pinerluttulerinermut inatsimmi aalajangersakkanik unioqqutitsisoqarsimaneq aamma ulorianartunik sakkulersornikkut qanittumiittut illersorneqarsinnaangitsumik ulorianartorsiortinneqarsimaneq.

Amerlasuutigut unnerluussisussaataitaasup taamaallaat uppersarsaatissaqartissinnaasarpaa seqqortoqarsimasoq kisianni suup tungaanut seqqortoqarsimaneq uppersarsarsinnaanagu. Taamatut pisoqartillugu aallaasersortoq politiit malittarisassaata unioqqutitsisimasut unnerluunneqartarput, taamatullu pisoqartillugu taamaallaat akiligassiisoqartarpoq.

Demokraatini isumarput naapertorlugu illoqarfimmi aallaasersorneq pillugu politiit malittarisassaanni aalajangersakkat taamaallaat inuusuttunut imaluunniit allanut oqattaasartunut imaluunniit illoqarfimmut qanittumi annermik minnermilluunniit ajoqutaangitsumik aallaasersornermut tunngatinneqartarput.

Aalajangersakkami tassani siunertaarpasinnigilaq Kalaallit Nunaanni ukiumut arlaleriarluni pisartumik tassa inuit aalakoortutik sumut tamaangga aallaasersortartunik pinngitsoortitsinissaq pinaveersaartitsinissarlunniit.

Taamatut aallaasersorneq sumiiffimmi pisoqarfiusumi annertuumik ersiortitsisarpoq innuttaasut toqqissisimajunnaartinneqarnerannik kinguneqartumik. Tamatuma saniatigut poliit nukippassuit atortarpaat assersuiniarlutik aallaasersortullu tigusariniarneranut.

Taamatut unioqutitsinerit Pinerluttulerinermut Inatsimmut ilanngunneqartuuppata politiit malittarisassaanniikkunnaarlutik taava periarfissaqalissaaq pinerluttut pineqaatissinneqarsinnaanngornissaat soorlu eqqartuussisoqarluni pineqaatissiinertaqanngikkallartumik, inuiaqatigiinni kiffartuussisussanngortitsilluni, Kriminalforsorgimit nakkutigisassanngortitsilluni piumasaralugu pinerluttuliortup imigassamut katsorsartinnissa aamma sakkortuulioqqittoqartillugu isertitsivimmiittussanngortitsisarnissaaq. Aamma periarfissaqalissaaq sakkulersortup sakkuinik arsaarneqarsinnaanngornissaa¹.

Demokraatini soorunami nalunngilarput unioqutitsisut tassaasartut aalakoortut imaluunniit puuarrallattut, taamaakkaluartoq inuiaqatigiinnit ersarissumik takutinneqarsinnaasariaqarpoq, taamatut pissusilersorneq akuerineqarsinnaanngilluinnartoq. Peqataanik Demokraatini pingaartipparput illoqarfinni aallaasersortoqartillugu periarfissaqartariaqartoq pineqaatissiinissaaq piumaralugu imigassamik atornerluinermut katsorsartittoqassasoq, taamatut pineqaatissiisoqarnissaaq tulluuppat.

Taamaattumik siunnersuuteqarpunga, illoqarfimmi aallaasersornermut tunngasunik Kalaallit Nunaanni Pinerluttulerinermut Inatsimmut ilanngussinissaaq pillugit Naalakkersuisut isumaqatigiinniqaqullugit peqquneqarnissaannik Inatsisartut aalajangiiffigisassaattut siunnersuut.

Demokraatini assigumik siunnersuummit saqqummiussaqaarpugut kingullermik UKA 2013² -mut atatillugu taamanilu Naalakkersuisuusut neriorsuinikuupput danskit naalakkersuisuinik isumaqatigiinniarnert aallartisarniarlugit. Naluara taamani Naalakkersuisuusut neriorsuutertik piviusunngortissimaneraat ukiup tulliani qinersinissap suaarutiginnigilaattaani. Aamma naluara qinersereernerup kingorna isumaqatigiinniarnert nanginneqarsimanersut. Paasivarali kissaatigineqartup Pinerluttulerinermut Inatsisip allanngortinnissaanut siunnersuummik Inatsisartut saqqummiussivigineqarnikuunngitsut.

Ikerinnakkut qinersisoqarnikuunera kiisalu maannakkut ukiut marluk ingerlareermata Inatsisartut aalajangiiffisassatut siunnersuut akuerimmassulli, pisariaqartutut isigisimavara siunnersuuteqaqqinnissara siunertaralugu Naalakkersuisut Naalagaaffiullu paasissagaat, Inatsisartut Inatsisartut aalajangiiffigisaata piviusunngortinnissaaq suli pingaartikkaat.

Naalakkersuisut akissumminni oqassagaluarpata Inatsisartut aalajangingaata piviusunngortinneqarnissaaq sulissutigineqalereersoq, sooruna manna siunnersuut siullermeerneqartinnagu utertinneqarumaarpoq.

¹ Perfissaaq ullumikkut pioreerpoq: Sakku arsaarinnissutigineqarsinnaavoq pinerluttulerinermut inatsimmik unioqutitsisoqarsimappat imaluunniit politiit malittarisassaataq unioqutinneqarsimappat. Unnerluussisartulli tunuarsimaarsimappat arsaarinnittarnissamut politiit malittarisassaataq unioqutinneqarsimatillugu taamaallaat pisuni ajorluinnartuni atornerqartarsimavoq. (Paasissutissat takuneqarsinnaappat Inatsinik atortitsinermut ataatsimiitap isumaliutissiissutaani UPA 2013/74-mi).

² UPA 2013/74

Pisortanut aningaasaqarnikkut allaffissornikkullu kingunerisassai

Siunnersuut Kalaallit Nunaanni Namminersorlutik Oqartussanut aningaasartuutiniq
nassataqassanngilaq aamma allaffissornikkut nukiit atorineqartussatut takorloorneqartut 1/4 AC-
årsværkimit annertunerunissaat naatsorsuutgineqanngilaq.

Inuussutissarsiornermut aningaasaqarnikkut allaffissornikkullu kingunerisassai

Soqanngilaq

Innuttaasunut aningaasaqarnikkut allaffissornikkullu kingunerisassai

Soqanngilaq

Taamatut oqaaseqarlunga Naalakkersuisut akissutissaannut kiisalu partiit allat oqaaseqaatissaannut
qilanaarpunga.